

摘藻堂四庫全書薈要

史部

欽定四庫全書薈要

史部

硃批諭旨卷一百七十五之三

詳校官編修臣繆晉

欽定四庫全書薈要卷八千一百三十五

史部

硃批諭旨卷一百七十五之三

硃批嵇曾筠奏摺

雍正七年三月初三日吏部尚書總督河南山東  
河道臣嵇曾筠謹

奏為恭謝

天恩事雍正七年三月初二日接准吏部咨文欽蒙

皇上聖旨授臣總督河南山東河道提督軍務隨恭設

香案望

闕叩頭恭謝

天恩訖竊臣一介庸愚至微極陋荷蒙

皇上殊恩特授河南副總河之職又復仰承

恩命兼管山東黃河堤工任事以來皆賴

聖謨廣運

睿慮精詳臣凜遵恪守夙夜冰兢而報稱無能時深惶

悚迺蒙我

皇上委任有加

特頒諭旨令尹繼善與臣分任南北二河之事又以治河之道必合全河形勢通行籌畫方可疏導安瀾特允廷臣議奏所有南北修理工程令臣等共同商酌會稿具題期於兩處均有利益仰見我

皇上聖明天縱洞悉河防

指示機宜無微不至臣聞

命自天措躬無地惟有益加謹慎詳求疏築之宜勤事

奔馳勉竭駑駘之力和衷共濟倍凜小心務期河  
堤鞏固運道深通以仰報

皇上洪恩於萬一耳除現在具本奏謝

天恩并一切應行事宜恭候

敕書印信頒發到日凜慎欽遵次第舉行外所有微臣

仰荷

新綸感激蟻忱先行繕摺

奏謝伏祈

睿鑒謹

奏

從前齊蘇勒肩任河防南北總局實皆倚賴今伊物故不但北河疏築各務須倍加籌計全河形勢悉當再四講求慎勿泥於紙上陳文廢棄齊蘇勒現行規畫尤不宜好奇穿鑿立意更張如閘壩之啓閉應時最為切要少失機宜所關匪細敬之慎之與南河諸臣和衷勉力為之

同日又

奏為請

旨事竊查山東運道北接

神京南連吳楚漕艘往來咽喉要地

天儲關係綦重是以從前總河衙門駐劄濟寧城內遙  
控上下設立標兵營弁一以催趲漕運一以彈壓  
地方原為有備嗣後河臣移駐清江不特豫東二  
省河防難於照應即地方重鎮防微杜漸之事亦



少經理我

皇上聖謨宏遠

特命河東二省添設總河俾黃水上游捍衛周密而催漕趨運亦有專司仰見

睿慮周詳尤為超軼千古臣每念濟寧路當孔道為五方雜處之區沿河一帶人情刁悍必須兵制嚴明查輯姦宄方為有益但從前專管黃河不敢越俎今蒙

聖恩命臣總督豫東河道提督軍務何敢因循推諉臣擬趁此黃水未經長發之時一面嚴飭道廳汛弁督率兵夫在工早夜修守一面馳赴濟寧凡一應疏泉濟運考驗弁兵稽察夫工利弊等事加為整飭即仍赴黃河工次督理修防庶黃運二河得以一體稽查不致兩相歧誤矣但未奉

已有旨矣應速往整理

敕書所有應辦事宜未經明晰不敢冒昧擅行臣世受

國恩疊膺

異數勉圖犬馬之報而知識短淺才具駑鈍總求  
聖主訓示開導以便敬謹遵循臣謹繕摺請

旨伏祈

皇上睿鑒謹

奏

此奏嘉悅覽焉內外大臣遇應辦理之事咸肯如是毅然擔任踴躍趨赴寧復有叢脞之虞更亦無庸丁寧誥誠矣至於南北分管各務如敕書內有開載未晰者會

疏聲明題請

雍正七年四月二十一日吏部尚書總督河南山

東河道臣嵇曾筠謹

奏為運道深通糧艘遄行仰慰

聖懷伏祈

睿鑒事竊臣一介菲材荷蒙

皇上洪恩畀以總督河東河道兼管運河復欽奉

諭旨命臣速往整理隨於四月初二日到濟寧任事所

有運河廳汛工程錢糧一面咨會江南河臣移取

檔案一面檄行兗寧道造具清冊俟到日詳加查

核并遴委河標左右二營遊擊暨河工效力人員

星夜催趲重運再嚴飭河閘官員遵照漕規定例

啓閉外臣即由濟寧州起程查勘運河并提閘等

工見一路河流通暢水深六七八九尺不等糧船

銜尾北上現今過濟已有三千餘隻至查濟寧迤

北馬場馬踏蜀山等湖水勢容蓄儘可濟運其安

山一湖少遜至南旺地勢窪下僅能洩運河之有餘不能補運河之不足至濟寧迤南如南陽昭陽微山等湖水面寬廣濟運尤為充裕但湖河間隔止此一線殘堤除滕嶧二縣工程未經估修外其餘堤岸歷經前任河臣撫臣題請興修有業已報竣者有現在興工者有因水佔艱於取土屢請展限寬期者臣俱飛檄行催立限趨工飭其設法修整早為幫築以資衛蓄目今天氣晴明日久臣已

分投委員查察泉源力為疏濬以冀源源接濟況  
馬場馬踏蜀山等湖尚有未經開放之斗門現在  
蓄水俟十分緊要方行宣洩濟運是濟寧以至臨  
清地勢雖高可以無慮所有水勢通暢糧艘利涉  
情形理合繕摺奏

聞仰慰

聖懷伏乞

皇上睿鑒謹

奏

適春夏之交稍覺缺雨正恐漕運或致淹遲覽奏甚為  
慰悅

雍正七年五月二十四日吏部尚書總督河南山

東河道臣嵇曾筠謹

奏為恭報黃河水勢工程平穩情形仰祈

睿鑒事竊惟時當夏令汎水將臨臣謹遵

訓旨先事預防所有豫省黃河南北兩岸應行修守之



處臣已嚴飭道廳文武汛官督率兵夫鑲墊堅整足資捍衛又移咨內閣學士協理河務臣徐湛恩勤加查察茲於五月初十日黃河長水三尺二寸旋即消落一切堤埽工程俱各平穩再運河糧艘遄行昨於五月十八日全數催過濟寧臣謹恭疏題報在案目下正屆東昌臨清一帶地勢高阜之處臣來往稽查閘座督令啓閉依時相機蓄洩以資浮送俟料理運河事竣臣即於六月初旬伏汛未

長之前星馳赴豫巡查兩岸工程務保無虞謹將  
現在黃河水勢工程平穩情形繕摺恭報伏祈

皇上睿鑒謹

奏

今歲春末夏初晴霽多時幸不至旱者賴去冬及二三  
月雨雪之膏澤耳目前數省缺雨堤工自應無恙但夏  
早則秋澇乃理之常伏秋兩汛或不無淋潦之虞先事  
綢繆最為緊要也濟運事宜尚可委員料理防河籌策

豈容時刻少疎亟宜旋豫督率巡察以盡力保固

同日又

奏為核定運河夫食銀兩去浮冒以收實效事竊臣

欽奉

皇上恩命管理東省運河查上自德州交界起下至江  
南邳州交界止計長一千一百四十三里為漕艘  
經由要地河則年年挑挖堤則歲歲增培所以運  
河捕河泇河東昌上下河五廳汛內共額設淺溜

橋閘兵徭酌壩等夫三千三百三十三名歲領工  
食銀三萬二千兩有零至冬春大挑不敷力作加  
募夫五千四百七十名幫貼銀六萬二千二百一  
十三兩有零小挑募夫一千四百二十一名幫貼  
銀四萬四千一十三兩有零俱係州縣經徵解交  
河官散給成例相沿已久其中加派多徵扣剋浮  
冒等弊種種不一臣現在嚴檄行查令各屬自行  
舉首革除外至幫貼一項前河臣齊蘇勒於雍正

五年節省銀二萬三千一百七十二兩零雍正六年節省銀二萬二千七百二十六兩零但去弊莫如淨盡立法當垂永久若不確加查核定有成規恐將來諸弊又緣之而起且既經節省廳汛各官無所用其浮冒遂將各項夫役應領工食銀兩肆其扣剋侵漁窮民力作經年博取微利以為養家餬口之計今有名無實則裹足不前大挑小挑呼應不靈甚至掩飾耳目潦草塞責殊非經久之圖

臣謬抒管見現在檄行東省司道費金吾等從長酌議將運河各廳所管汛內通盤核算每年額設夫役若干名應給工食若干兩逐一均勻派定飭令道廳各員點其數目察其工作不許有絲毫虛冒扣剋外其餘幫貼銀兩竟行藩司禁止多派祇照舊額徵收解貯河庫遇有挑淺築堤關係緊要工程再行詳請加募按工雇夫按夫給價則應徵之夫食悉歸實用多派之規費徹數革除所有幫

貼羨餘銀兩全以歸公不特有裨

國帑無累民生而河道堤工歲修月浚亦無單薄淺  
澁之虞矣緣臣才質駑鈍知識短淺一應條分縷  
悉之處尚在詳加妥議務期諸事允協方敢恭疏  
具

題所有運河夫食等事臣將查核緣由先為繕摺奏  
聞伏祈

皇上睿鑒謹

奏

朕御極之初即有人條陳此一節經發廷臣會議咸言  
不便更張朕意如果有利無弊諒齊蘇勒必早奏聞矣  
不可圖邀一時虛譽任意增減臨期束手無策那西補  
東翻致弄巧成拙田文鏡老成練達權量得宜不涉偏  
執朕所信任弗疑者當與之密相妥商會摺具奏凡類  
斯沽名之舉居功事後罪猶可恕倘於未行之前有意  
張揚以示德於無知小人及或議不果行終俾恩歸於



已怨歸於上竝卸過於同事乃取禍之道也萬勿循此軌轍戒之誌之

此諭亦密與田文鏡看

同日又

奏為恭謝

天恩仰祈

睿鑒事雍正七年五月十一日臣齋摺家人敬捧

皇上御賜臣母香珠二串藥錠一匣又蒙

恩賞臣香珠二串藥錠一匣臣隨跪迎道左恭設香案  
望

闕叩頭謝

恩祇領訖伏念臣父嵇永仁殉節閩疆臣母楊氏時年  
二十四歲苦歷冰霜經今五十七載上年仰邀

曠典得蒙錦緞之頒屆今又荷

皇恩復拜靈丹之錫

榮施罔極浩蕩難名竊臣自受任副總河以來原於武

陟地方賃居民舍後以河勢下移隨時搶護孑然  
一身日往來於豫東二省之交擇險奔馳寓居秋  
隘所以烏烏私情不遑將母今蒙

皇上天恩畀臣以總督河東河道兼管運河查總河舊

有衙門駐劄濟寧去臣本籍雖千里有餘而一葦  
骨肉至情睽違數載一旦歡聚家庭融洩可想而知聞  
可航臣數年睽隔孺慕情深昨以扁舟迎養甫得  
至此不覺心神為之俱爽

到署即蒙

湛恩遙賁崇朝適至臣母踴躍歡忭虔稱佛號恭祝

傳旨致問汝母佳善

萬壽無疆并諭臣殫盡血誠勉圖報效臣追隨膝下彌

深感勵惟有愈加黽勉竭力宣防永矢踵頂之捐

糜冀報

高深於萬一耳臣謹繕摺恭謝

天恩伏祈

睿鑒謹

奏

覽奏謝矣以卿現居職任而論如欲為母延年兼貽福

後裔惟在鞏固金堤登沿河萬姓於衽席之安而已除  
此別無良技設以全活無數姦匪姑息枉法貪官謂能  
積功累行不但上無益於母下無益於子孫且恐冥默  
中更造孽靡涯也然乎否耶其審思之

雍正七年六月十五日吏部尚書總督河南山東  
河道臣嵇曾筠內閣學士協理河工事務臣徐湛  
恩謹

奏為欽奉

上諭事雍正七年六月十三日接准河東督臣田文鏡  
咨開欽奉

硃批諭旨今歲直隸各省雖不為旱大都雨水欠足從  
來物極必反春末夏初既苦愆暘夏末秋初或恐霖  
潦不免也一切河工堤岸之防護俱當綢繆於早加  
倍慎重將朕此諭轉傳河臣嵇曾筠暨大小河員悉  
令知之欽此欽遵移咨到臣跪讀之下仰見

皇上睿慮周詳先事綢繆慎重河防無微不至臣欽遵

聖訓即傳知大小河員愈加敬慎防範於夏末秋初更當加倍小心各屬河員兵夫咸感激

天恩踴躍奮勉務期防護嚴密時屆伏秋尤當加謹修守以圖鞏固竊照黃河自桃汛以後水勢逐漸消落嗣接寧夏府報稱五月十八日水長二尺有餘臣曾筠於六月初三日赴豫在三家莊芝麻莊查閱埽壩各工見河水長有三尺五寸隨即消落則知寧夏水頭已過嗣後陰雨連綿沁河發水至十

九十一百七十五之三  
一十二日臣到祥符見河水又長四尺七寸前後

俱未出槽臣復巡查南北兩岸逐細確勘堤埽工

程俱各堅實穩固料物堆積崇墉堤坡草根蟠結

高柳卧柳層層障蔽足資捍禦即雨淋水溝亦甚

稀少業經嚴飭廳汛員弁隨時督率兵夫上緊填

補竝無絲毫罅隙至曹單二縣工程臣徐湛恩前

往查勘歲修堤工現在陸續趨築諸望壩新做埽

工俱已鑲墊出水八九尺不等現今兩岸禾苗茁



茂三時甘霖疊沛黃沁水勢隨長隨消今歲伏秋  
安瀾有象此皆仰賴我

皇上敬

天勤民至誠感召雨暘時若

神明默佑之所致也臣等惟有凜遵

諭旨於夏末秋初伏秋交際之時倍加小心住宿堤岸  
晝夜防範分投查察務使兩岸堤工有金湯之固  
黎民登衽席之安以仰副

皇上宵旰憂勤諄諄告誡之至意所有欽遵緣由以及  
黃沁水勢工程平穩情形理合繕摺奏

聞謹

奏

勉之慎之直待金行序轉水落歸槽方可暫息顧慮也

雍正七年七月二十日吏部尚書總督河南山東  
河道臣嵇曾筠內閣學士協理河工事務臣徐湛

恩謹

奏為恭報伏秋交會水勢工程平穩情形仰慰  
聖懷事竊照今歲伏汛陰雨連綿沁黃長發誠如  
聖諭夏末秋初雨水過多仰見我

皇上睿謨深遠明燭機先臣等凜慎欽遵倍加寅畏以  
固河防查寧夏府報黃河水長三次各二尺有餘  
沁河報長水四次有二三四尺不等但黃沁單行  
則勢甚和緩竝不出槽黃沁竝漲則勢頗浩瀚卑  
窪之處間有出槽然皆順軌安行中泓容納深通

不致衝激為患更兼長水之時風色寧靜波恬浪平所以河堤鞏固現今伏秋交際正工程喫緊之時查上年料物備辦原多又有汛船足資輓運現將兩岸埽工竭力加鑲高厚堤工土牛豐積嚴飭兵夫就近取用填墊水溝堤頂亦皆平整臣等分投查勘督率道廳汛弁曉夜巡防俱可力保無虞  
恐塵

聖懷謹將伏秋交會水勢工程平穩情形恭摺奏

聞伏祈

皇上睿鑒謹

奏

覽安瀾景象朕懷深慰然霜降未過何敢泰然釋念耶  
期共加勉敬慎以畢今歲修防

吏部尚書總督河南山東河道臣嵇曾筠謹  
奏為恭謝

天恩事雍正七年六月十六日臣齋摺家人敬捧

皇上恩賜臣母

御窰磁器四種錦香袋十枚又蒙

賞臣花籠扇墜一提臣隨跪迎道左恭設香案望

闕叩頭謝

恩祇領訖竊臣樗櫟庸材至愚極陋供職河防毫無報  
稱蒙

聖恩高厚俾得迎養臣母寸草春暉皆出

皇仁之浩蕩是以恭摺奏

聞迺荷

聖心悅豫喜動

天顏伏念臣母年屆八旬仰沐

溫綸下問雲霄降福歡洽萱庭從茲臣母得以馴致耄

期皆

天語春溫之所賜也微臣母子不知何修而得此又蒙

恩施稠疊

賞賚頻加頒從

內府捧至河干 臣緘封什襲齋歸 臣母遠勝斑衣起

舞臣母恭頌

奇珍盈盤耀彩滿室飄香感深喜躍婆娑瞻拜焚香叩

佛虔祝

萬壽無疆 臣感切蟻忱實難口達惟有凜遵

聖訓曉夜驅馳實心修守務保兩岸長堤金湯鞏固俾

果能竇踐斯言為蒼生造福為母延齡均在其中矣忠

孝所關不敬慎黽勉可乎

洪慈於萬一耳謹此繕摺恭謝



天恩伏祈

睿鑒謹

奏

覽

雍正七年八月初三日吏部尚書總督河南山東  
河道臣嵇曾筠內閣學士協理河工事務臣徐湛  
恩謹

奏為恭報秋汛水勢工程平穩情形仰慰

聖懷事竊照豫省黃沁兩河自伏秋交會以來循軌安  
瀾工程平穩臣等已經

奏明在案嗣於閏七月內據寧夏府報黃河長水二  
次計一尺有餘并二尺不等沁河報長水二次計  
二尺有餘并三尺不等當沁黃交漲之時臣等飛  
飭員弁兵夫防閑愈加謹密所喜河泓深廣容納  
暢流不致泛溢兼之兩岸堤埽工程俱各加鑲高  
厚填墊堅整雖水勢接連長發而足資捍禦極其

平穩目今時屆秋分水勢已定臣等惟有凜遵

聖諭敬謹督令修防直至霜降後方敢竣事所有秋汛  
水勢工程平穩情形臣等謹繕摺奏

聞恭慰

聖懷謹

奏

時屆秋分水勢如此堤工諒必無虞矣雖然屈指霜降  
尚有彌月之期何可坦然釋懷仍當加謹防護

吏部尚書總督河南山東河道臣嵇曾筠兵部尚書總督河南山東等處地方兼理河道臣田文鏡  
謹

奏為欽奉

上諭事雍正七年六月十六日臣曾筠齋摺家人敬捧  
皇上御批臣為核定運河夫食銀兩等事奏摺欽奉  
硃批諭旨跪讀之下仰見

睿慮周詳無微不至臣惟有凜遵

訓旨加慎加密敬謹辦理緣查勘豫省堤工即馳至汴  
城與督臣田文鏡密為商議而督臣於此中利弊  
亦早已留心體察臣等遂細為商酌查東省運河  
額設淺溜橋閘等項長夫共計三千三百三十三  
名歲支工食銀三萬二千餘兩在於各州縣地丁  
項下動用報銷冬春小挑不敷力作則於長夫之  
外添設酌補夫一千四百二十一名間年大挑則  
於酌補之外又加募夫五千四百七十名所需工

食往例在於民間地土按畝輸錢名曰幫貼小挑之年共計幫貼銀四萬四千餘兩大挑之年共計幫貼銀六萬二千餘兩此酌補加募之由總因運河水勢靡定水小則流緩沙停水大則噴沙淤積是以大挑小挑乃係運河一定之工程長夫募夫均係河工必需之力作況力役迺小民分內之事而幫貼則免其遠涉之勞惟當察除額外之浮費不便議減一定之幫貼寧留有餘以備不虞無致

臨期而或束手但從前毫無稽察經徵州縣有多  
派濫徵之弊廳汛員役有需索陋規扣短冒銷之  
弊邇年以來在工員役冒銷之弊漸次清除其他  
仍然如故所以臣等各自留心體察以期民免浮  
派帑歸實用惟是各夫工食舊額多寡不同有已  
支工食而重索幫貼者其應添跨夫應用器具又  
令長夫自行雇覓自行購辦不但影射侵漁冒銷  
分蝕難以究詰抑且有同一夫役而工食互異苦

樂不均者臣等按其力作通盤核算酌定工食以  
為常則請將淺溜軍橋徭壩等夫每名每歲給工  
食銀一十二兩量給器具銀八錢閘夫啓閉辛勤  
每名每歲給工食銀一十四兩四錢量給器具銀  
八錢兵夫仍照兵餉之例每名每歲給工食銀一  
十四兩六錢四分亦量給器具銀八錢以上各夫  
共需銀四萬六千五百六十餘兩除各州縣額編  
工食銀三萬二千二百四十餘兩外其不敷銀一



萬四千三百二十餘兩在於幫貼項下照數找足  
至於酌募等夫自築壩岸水以至啓壩放水內有  
需工三十日以至六十日者每日量給工價銀六  
分每名量給器具銀二錢亦於幫貼項下照數支  
給仍令各該濱河州縣雇募交發河員將到工名  
數冊報道廳轉報臣衙門即遴選幹員分投查點  
務使名名著實按工計夫按夫給價則因地制宜  
工程既有定限分查總核夫役亦難虛冒其節省

銀兩俱令解交運河廳庫報明存貯以為河工緊要工程之用臨時仍

奏明動用報部備案至於水勢有大小淤沙有厚薄酌補募夫多寡原難預定設有應添應減之處臨期責令道廳據實詳報以憑酌核務期無誤運行所有一應夫工確數盈餘銀兩統於冬春挑河竣事後臣等核實題明另造清冊咨部備案如有扣短侵冒等弊立即據實糾叅嚴加治罪庶帑不虛

糜工收實效夫食無偏枯運道民生均有裨益矣  
為此遵

旨恭摺會

奏伏祈

皇上訓示遵行謹

奏

所議甚屬妥協如應題達照此會疏具題不必贅敘前  
奏

雍正七年八月二十四日吏部尚書總督河南山東河道臣嵇曾筠內閣學士協理河工事務臣徐湛恩謹

奏為秋汛已竣恭報水勢工程平穩情形仰慰

聖懷事竊查豫東二省黃河自入伏以來臣等凜遵

諭旨倍切小心所有南北兩岸應行修守之處時時嚴飭道廳汛弁督率兵夫將土埽工程增加寬厚茲於八月初旬因大雨積水黃沁又復加長至初七

初八等日接連異漲掃灣迎溜之處長至七尺八

尺不等緣從前汎水尚未全消而天雨連日山陝  
兩省伊洛漚澗丹沁諸水滙入黃河竝漲遂致平  
漫出槽一派汪洋直至堤根全賴兩岸堤工堅厚  
埽壩防風俱各鑲築高寬足資捍禦所以此番水  
長雖消落稽遲連日浸泡而工程穩固不致疎虞  
間有臨河越堤逼近黃流水勢騰湧沿灘而上所  
恃料物廣多兵夫齊集曉夜搶護竝無貽誤再查

豫省之三家莊原為首險工程黃流自南而北久成頂衝之勢以致修守不遑上年曾蒙

聖諭於對岸沙灘相機開挖引河導水東流臣等細加審視因係曠衍平灘河頭無吸川之形河尾無建瓴之勢所以未敢輕舉倘河勢稍有遷移即當乘時開挖乃此番長水之後南北兩岸沿堤掣溜之河身俱為淤斷而對岸大灘之內條汕深渠中流直瀉成河竟至大溜離三家莊壩臺約有數百丈

之遠伏思開竅引河非千萬人夫不能趨事亦非  
盈萬帑金不能興作今中間自沙河泓奔騰浩瀚  
百日之工成於一旦三家莊埽壩俱現淤灘化險  
為平藉非

神力何能至此皆由我

皇上愛育黎元奠安河岳

聖心誠敬上格於

天所以水土治平下孚於地臣等往來河畔目擊情形驚

喜之至愈。生寅畏服膺。

聖訓更加敬慎。謹據實奏。

聞仰慰。

聖懷伏祈。

皇上睿鑒。謹

奏。

所奏欣悅覽焉。此乃卿等忠誠敬慎。默有以感格。

神明之驗。朕嘉與慶。幸筆不能宣。覽愈生寅畏。一語來歲。



安瀾又可預卜矣我君臣期共加勉以茲

雍正七年十月二十八日吏部尚書總督河南山

東河道臣嵇曾筠謹

奏為恭報豫省運河通暢糧船全數出境日期仰慰  
聖懷事竊照豫省漕河惟資丹衛二水濟運自衛河源  
蘇門山新泉湧出經臣奏

聞奉

旨欽賜靈源昭瑞匾額嗣後每歲泉源暢流漕艘利涉

然皆於十二月內方得開船北上今年當糧船回  
空之日即預為申飭疏濬務期一律深通以濟運  
行茲據糧道張建德河北道朱藻報稱庚戌年起  
運糧船已於十月二十六日全出豫境總由年登  
大有輸將既易而各道泉源濬發運河深暢是以  
糧艘通行得如此之迅速我

皇上親灑

宸翰靈源昭瑞

聖德感孚至誠不應從此億萬斯年皆慶輓輸之利便  
矣再查豫東二省黃河水勢消落歸槽兩岸堤工  
金湯屹峙臣嚴飭道廳督催文武員弁兵夫堆積  
土牛修整殘缺并乘天氣晴明星速運料貯工以  
備來歲修防之用臣即馳至濟寧辦理東省運河  
大挑諸務外所有豫省糧船出境日期理合恭摺  
奏

聞伏祈

睿鑒謹

奏

覽奏各道泉源濬發運河深暢糧艘於十月內已全出  
豫境皆由卿等忠勤任事昭格於上下

神祇是用獲茲佑助切宜愈加誠敬不可絲毫肆念勉之  
雍正八年二月二十二日吏部尚書總督河南山  
東河道臣嵇曾筠謹

奏為恭報運河大挑工竣兼陳水勢深通情形仰慰

聖懷事竊臣前赴濟寧一帶督催大挑工程查勘各州縣水道業已敬謹奏

聞在案伏查上冬今春例屆大挑之年臣以運道輓輸國儲關係綦重隨嚴飭道廳查估臣復親馳相度自臨清以至臺莊凡壅沙淤墊之處俱令徹水歸湖逐段築壩分投挑挖除額設淺溜軍徭等夫通數赴工力役外其需用酌補加募人夫應給工食銀兩悉照欽蒙

皇上俞允酌定則例臣凜慎奉行檄飭濱河州縣每名  
日給銀六分實數實發益以器具之資俾各夫  
俯仰有餘踴躍趨事是以欣欣于來歡呼恐後更  
幸冬末春初天氣晴和冰雪旋消胼胝之勞未形  
其瘁畚鍤之易殊見其速業於二月初旬陸續報  
竣以視上年較早完工一月臣又親往察勘見在  
在河身備極寬深普律如式淤沙挑淨足資容蓄  
臣因查工至加河已有南來糧艘抵東省境於二

月十五日入臺莊聞各幫亦俱陸續前進隨飛  
飭沿河廳汛將水櫃各湖口門加謹堵閉以備將  
來之用但令啓壩開放汶水灌注接濟現在東省  
重運催趲遙行臣看來不特大挑工程早完一月  
即江南糧艘亦早到一月皆由我

皇上宵旰勤求

帝德廣昭天時水澤嘉祥輻輳所致也現今挑汛將屆  
臣前往豫工督率修守務保堤防於永固所有運

河大挑工竣水勢深通情形理合恭摺奏

聞伏祈

睿鑒謹

奏

覽運河大挑工竣水勢深通情形甚為嘉悅非卿殫心  
籌畫實力經營何能奏此速效耶

同日又

奏為水利興舉需時道員查勘未竣冒昧瀆奏仰懇



聖鑒事竊照東省水利荷蒙

皇上睿慮周詳

聖謨鴻遠俾沮洳化膏腴之地為生民規萬世之利甚  
要務也本年正月內臣在豫省即同督臣田文鏡  
會委兗寧道呂維炳前赴魚沛二縣一帶下游水  
道循溯而南直抵海口令其遍加查勘專心經理  
現在沿途逐細勘查尚未竣事今於二月十七日  
准吏部咨開江南河臣孔毓珣以呂維炳諳練河

務於河庫河務均關重大等事案內

題請調補淮徐道其充寧道缺令臣與督臣田文鏡  
會同揀選部覆奉

旨康宏勳等依議補授餘依議欽此咨行到臣隨欽遵  
咨會去後伏思江南河務重大工多汛險仰塵

宸懷自應就令該道星馳調任但充寧一道管轄黃運  
兩河工程錢糧倉儲河務均為緊要非閱歷河工  
有年者不能勝任臣與督臣田文鏡詳加揀選一

時難得其人且現在興舉水利驟更生手地形水道不克瞭如指掌尤難措置合宜仰懇

皇上天恩俯允暫留呂維炳經理東省水利事俟揀選得人堪以委代之日方令其前赴調任庶臣等得以揀選好員而水利要務駕輕就熟尤易見功矣是否可行臣不揣冒昧謹繕摺瀆

奏恭請

敕旨伏祈

皇上睿鑒謹

奏

所奏是田文鏡亦曾具摺陳請但淮徐道所管事務甚屬緊要缺難久懸候朕斟酌有旨

雍正八年三月二十日吏部尚書總督河南山東

河道臣嵇曾筠內閣學士協理河工事務臣徐湛

恩謹

奏為荊隆口河勢北趨急請開挖引河以順水性以

保堤工仰祈

睿鑒事竊查豫省黃河全勢既復故道則舊時險要之處必須先事提防茲有北岸封邱縣荊隆口者因南岸淤灘日漸增長全黃大溜逼注北岸該工坐當數十里之頂衝掃灣汕刷塌卸河厓去堤僅五六十丈雖現經多備料物加幫戩堤嚴飭道廳汛弁相機上緊修防務保無虞但查該工乃舊時決口順治九年河決封邱大王廟口由直隸長垣越

東省運河北注於海興工堵塞需用夫役錢糧累  
歲不下數十萬計方得成功今荆隆口與大王廟  
古黃池首尾交接咫尺相連內臨積水深潭形如  
釜底北面雖有汰黃舊堤卑矮殘缺難資捍禦外  
灘皆屬浮沙堤根之下又係舊時朽椿腐埽一遇  
黃水漫灘未免氣脈相通若至伏秋汛長水勢奔  
騰撞擊總有長椿大埽衛護周密難支經久且埽  
工必須歲歲加修需帑繁多而大溜緊逼上堤下

坐呼吸變遷終非萬全之策臣再四思維必須於上游對岸開挖引河分洩水勢則荆隆口一帶險工便可邀於漸成平陸洵為一勞永逸之舉隨率同道廳等官乘舟由上而下細加審度現今上游之黑埕口刷成兜灣天然自立河頭大有吸川之形至柳園口自高而卑河尾噴瀉亦得建瓴之勢形勢既成急應迎溜開挑俾水由兩岸之中泓暢流東注南北堤工俱堪保護平穩從前武陟之倉

頭口儀封之雷家寺等處引河至今通暢舊日河  
身業已化為沃壤桑田今若於荆隆口上游開挑  
引河便得化險為平則億萬斯年運道民生皆沐  
我

皇上胞與生全之德矣臣等查勘詳確隨會商督臣田  
文鏡亦云引河該挑須早興工當飭道廳確估工  
長三千三百五十丈需用土方銀二萬七千九百  
二十兩零因係緊要工程一面先動河銀選委幹



員劃地分工檄委河北道朱藻催趨乘時挑挖臣  
等復嚴加督催務期速竣俟汎水長發相機開放  
以保荆隆口古黃池一帶要工敬會疏具

題照例請撥藩庫銀兩還項臣等謹繪圖繕摺恭呈  
睿鑒伏祈

皇上訓示遵行謹

奏

所見甚是詳覽圖式審度地形允宜開挖引河以分洩

水勢務於伏汛前竣工方為有益也

雍正八年四月初八日吏部尚書總督河南山東

河道臣嵇曾筠謹

奏為恭報頭次糧船通數過濟黃運兩河水勢安流  
仰慰

聖懷事竊臣接准部咨頭次過淮糧船三千七百九十  
四隻漕臣

題報欽奉

諭旨命沿河督撫鎮道等官撥兵防護速催抵通欽此

欽遵臣隨飛檄沿河鎮將道廳等官上緊催趲撥

兵防護復遴委效力員弁分投往來巡催去後令

據報頭次糧船通行過濟較上年更加迅速總由

皇上敬誠感召雨澤調勻所以運河水深俱有四五六

七尺不等糧艘遄行民船接踵堪資浮送均無淺

澁之虞至於黃河水勢陸續漸長漸消循流順軌

在在安瀾惟恐廳汛各官習見工程平穩致滋懈

怠復嚴申誠諭思患預防臣往來河濱見二麥秀  
實飽綻灘地潮潤倍加醲郁豐收在即黃童白叟  
歡戴

皇仁仰見

聖主德洋恩溥上應

天和雨暘時若

指示工程周詳綿密以致民物盈寧平成有慶也所有  
頭次糧船通數過濟竝黃運兩河水勢安流情形

謹繕摺奏

聞仰慰

聖懷伏祈

睿鑒謹

奏

黃運兩河水勢安流深慰朕懷近日畿內地方頗覺乾旱朕甚以為憂覽奏內二麥長茂情形朕不為豫東二省雨暘廛念矣

雍正八年四月十五日吏部尚書總督河南山東

河道臣嵇曾筠謹

奏為道員貪婪不職有負

聖恩謹循例會叅恭摺

奏明兼陳員缺緊要情由仰祈

睿鑒事竊臣蒙

皇上天恩畀以河防重任督理東豫二省工程凡關寸  
工寸料無不留心稽察一切屬員俱各勉其實心

朕所以誥誥訓諭御等慎勿過信屬員也然不逆詐不

辦事初不料伊等暗中借索有抑勒賄墊之費併

億不信亦無須預為疑防但隨時隨事留心體察真偽

不料及河道河庫近在豫城耳目之地有滋侵扣

自莫能掩誌之

之舉也本年正月內臣在豫省以管河道祝兆鵬

引見時即經有旨諭田文鏡觀祝兆鵬人雖明敏或恐

居官漸不如前每見必嚴加勸諭嗣又於三月十

品行不端當切加訓誠試用是以田文鏡繼有自悔之

二日臣查工到豫省即率領司道公同盤查其庫

奏則盛言其優未嘗去口齊蘇勒來京復再三稱其

項雖無短少實切心疑蓋因伊彌補前任山西忻

居官勤慎反露有識評田文鏡苛刻之意而孰知果不

州虧項甚多從何措置當經接見署開封府事下

出朕前所言料也

南河同知劉永錫細加盤問復遍為密察今三月

二十八日又聞該道發給下南河同知陳儀加幫  
月堤銀四千兩扣短輕平穢蹟昭著因而察得該  
道詭詐行為暗侵硬扣無所不至贓私纍纍殊堪  
駭異正在咨會督臣而督臣與該道近在同城會  
稿旋來臣即會疏

題叅請

旨嚴究在案惟是該道遺缺甚屬緊要管轄南岸開歸  
二府鄭榮二州縣工程數百餘里堤長汛遠又通



省河工錢糧弁兵河餉收納支解皆總滙於此所  
關重大必須曉暢工程兼得廉幹而有才者方克  
勝任查現任如開封府上南河同知在任守制拖  
克拖海在工年久熟悉河務其餘皆學習初成若  
夫才守兼優而又諳練河防善能整肅職業者則

惟今保

在任守制亦可暫行如果稱職於叅本奉旨後具疏題  
題在任守制河北道朱藻一員足以調補但河北一

補

道責任匪輕高難其選復未便遽為更易除臣與

督臣現在的酌量就近委員暫行署理外恭候

命下到日即在豫東二省各員內細加選擇再行請

至時有旨命卿等選擇保題也

旨補授管河道缺庶臣得收臂指之效矣臣不敢冒昧

擅便謹繕摺具

奏仰懇

訓示敕遵伏祈

皇上睿鑒謹

奏

覽

雍正八年五月初六日吏部尚書總督河南山東

河道臣嵇曾筠謹

奏為恭謝

天恩事雍正八年五月初三日臣接准兵部咨文欽蒙

皇上聖旨命臣署理南河總督印務隨處設香案望

闕叩頭恭謝

天恩訖伏念臣樗櫟菲材至愚極陋仰蒙

皇上天恩拔擢洊列卿班畀以河防重寄任事以來寸  
長未效乃荷

高厚隆恩有加無已茲以南河總督印務關係緊要著  
臣署理又以臣雖久任北河而於南河事宜尚未  
熟悉著撫臣尹繼善悉心協辦仰見我

皇上睿慮周詳無微不至矜全怙冒體恤靡遺臣跪讀  
恩綸感激涕零徬徨莫措惟有愈加敬畏實心辦理永  
慶淮黃底定海甸安瀾工程鞏固閭井熙恬以冀

仰報

洪慈於萬一耳除現在具本恭謝

天恩外所有微臣仰荷

新綸感激蟻忱先行繕摺奏

謝伏祈

皇上睿鑒謹

奏

覽卿奏謝矣全河底定永慶安瀾惟卿是賴其悉力宣

猷以克副朕望勉之

同日又

奏為欽奉

上諭事竊臣猥以菲材感荷

聖恩高厚

特命署理南河總督印務伏查南河地方工長汛險淮  
黃交滙實為緊要之區理應即日起程緣挑挖封  
邱荆隆口對岸引河已經告竣現在守候汛水長

發開放當將一應機宜面商督臣田文鏡并議交

代前往詎督臣以封邱引河乃荆隆口古黃池一

帶險工藉此預為補救關係甚鉅今雖挑挖竣工

而汎水未發恐開放之時機宜稍有未協便難奏

績於臨期且以臣歷年辦理引河著有成效堅執

固留臣竊思汎水長發順流東注此地引河固可

成功而淮徐等處險工林立亦須及早督查何敢

稽遲時日其如督臣十分慎重現在具摺請

旨伏念我

皇上道宏位育功茂平成南朔東西原無岐視可否容  
臣暫留旬日開放引河之後即從封邱工次馳赴  
淮徐一路查工到任但未經奏請

聖示臣心惴惴實切悚惶之至除現在飛差書吏馳至  
濟寧衙署檢齊歷年卷案并同領到關防另容交  
代督臣兼管外臣謹繕摺請

旨伏祈



皇上敕諭遵行謹

奏

自應於開放引河之後赴淮到任所奏嘉是覽焉業命  
史貽直署理江督尹繼善此際可以分身料理矣將北  
河要務一一明白指示於范時繹然後趨程而南諒未  
為晚

同日又

奏為欽奉

上諭事雍正八年四月初三日接准工部咨因山東兗

寧道呂維炳經總河孔毓珣題補准徐道員缺臣

等具摺奏請留其查勘山東江南水道工程欽奉

聖諭著康宏勳照舊兼管將呂維炳暫留充寧道之任

俟新修工程勘估造冊定議之後該督等奏聞令呂

維炳前赴新任其充寧道員缺仍照原議揀選題補

欽此欽遵臣即催該道星速勘估今於四月二十

一日回濟據該道會同淮揚淮徐二道逐加踏勘

審視上下源流遍歷湖河探量地勢高卑將應行  
疏築節宣之處因地制宜相機利導分勢開引以  
達於海估用土方夫工冊詳到臣正在會商旋聞  
河臣孔毓珣已故而臣等未及勘議其間應疏應  
浚機宜殊難遽定今臣欽承

恩命署理南河總督印務俯容臣到任之後履工親勘  
詳加相度會同江蘇撫臣尹繼善等畫一定議敬  
謹奏

聞恭請

是睿裁再准徐河務殷繁修守攸關綦重今呂維炳既將

前項工程已經勘畢應遵

旨令其前赴新任至兗寧道缺臣與督臣田文鏡再四商酌惟有兗州府知府王鴻勳辦事勤慎熟諳河防吏治工程兼堪勝任臣謹繕摺恭請

訓示伏祈

睿鑒謹

奏

卿於前摺薦舉拖克拖海今何未見言及斯二員中與  
督臣田文鏡擇相宜者一人指名題請可也

雍正八年五月十七日吏部尚書總督河南山東  
河道臣嵇曾筠謹

奏為恭請

聖訓事竊臣於本年五月初七日接到內閣知照雍正  
八年四月二十九日奉

上諭前總河孔毓珣未故之前凡所奏河工事宜摺子  
朕皆一一批發計此時有雖到而尚未施行者亦有  
未經接到者爾等可即行文與嵇曾筠及孔毓珣之  
子凡有關係河工事件批示摺子著孔毓珣之子悉  
交與嵇曾筠其有未經拆封者悉令嵇曾筠開看遵  
照辦理欽此臣即望

闕叩頭凜慎欽遵訖竊思南河地方汎遠工多如清口  
之淮黃交匯高堰之湖河屏障攸關運道民生而

且淮徐一帶為上游之門戶安東各處係洩水之  
咽喉更為關係匪輕其間因地節宣相機疏築防  
河濟運均須斟酌萬全臣特邀

曠典膺茲重寄即思瞻覲

天顏叩請

聖訓祇以封邱對岸挑挖引河守候汎水以致稍遲旬  
日今引河業經開放汎水亦已盛長南工緊要未  
敢再延臣即從豫東一路循歷河濱查勘工程前

往赴任所有欽奉

皇上硃批孔毓珣奏摺凡關河工事件自當敬謹開拆  
遵照辦理臣世受

國恩疊膺

異數勉圖竭盡犬馬之報而知識短淺才具駑鈍敬懇  
聖主多方訓示開導愚蒙庶臣得以凜遵恪守更感  
天高地厚之恩於生生世世矣除起程日期另疏

題報外臣謹繕摺恭請



訓旨伏祈

皇上睿鑒謹

奏

遇應訓誨處自必隨時批諭無庸懇請切囑者或因慎重錢糧起見預疑屬員侵尅以致稽延緊要工程只此一節少為卿慮事事常存過猶不及之念其庶幾乎

同日又

奏為請

旨事竊惟南河地方汎險工多臣以菲材奉

命督理必得勤敏幹員隨臣調遣方為有益茲有現任

河南衛輝府通判范昌治才猷敏練熟諳修防經

臣保

題引

見奉

旨補授今職查衛河原屬內汎本非要缺可否仰懇

天恩容臣帶至南河查勘工程或遇有相當員缺另疏

題補以收臂指之用再有河南虞城縣革職知縣李  
槃為人誠實曉暢河防前因諱盜叅處經臣具

題引

見奉

旨留工効力又有原任山東博平縣縣丞姚世理諳練  
河務勤慎穩當經東昌府上河通判白嶸保詳督  
撫出具考語送部引

見奉

旨命往河南酌量委署試用再有原任直隸吳橋縣縣  
丞劉永錡河務嫻熟辦事小心向年効力豫工取  
有本旗身家殷實印結在案嗣後効力水利營田  
題補令職因弓馬生疎解任學習查該員弓馬雖未  
熟練而河防尚能曉暢以上各員均屬有用之才  
可否并懇

天恩容臣一同調至南河酌量委用則調遣有人分查  
無誤庶於河防諸事得收實效矣為此繕摺請

旨伏祈

皇上訓示遵行謹

奏

准照所請帶往一面咨明該部但隨帶舊屬未必即收  
臂指之用而南河現在人員不無先存親疎之嫌反恐  
益少而損多朕屢諭各省督撫之旨甚屬明晰河工雖  
非他任可比亦當再四酌量或於其中減退一二人或  
竟全數帶去酌妥而行異時方知朕言之不謬也

雍正八年六月初六日吏部尚書總督江南河道

臣嵇曾筠謹

奏為欽奉

上諭事竊照兗寧道呂維炳查勘山東江南水道已經  
詳報竣事應赴淮徐道新任所遺之缺會商督臣  
田文鏡擬將兗州府知府王鴻勳補授特具摺請  
旨欽奉

硃批卿於前摺薦舉拖克拖海今何未見言及斯二員

中與督臣田文鏡擇相宜者一人指名題請可也欽

此伏查拖克拖海在工年久熟悉河務原屬幹練  
之員前因管河道祝兆鵬會叅遺缺緊要當經奏  
薦拖克拖海竝河北道朱藻足膺調補嗣與督臣  
面為商酌河北一道分守彰衛懷三府兼管北岸  
黃河堤埽工程密邇運河尤為喫緊屈指屬員內  
堪以代朱藻辦事者一時難得其人未便遽為更  
調維時臣等即將拖克拖海委署管河道印務見

其料理才情頗有可觀臣與督臣隨經會疏  
題補管河道缺現在祇候

聖旨至兗寧道缺吏治河防均需練達臣查王鴻勳於  
雍正元年隨前河臣齊蘇勒堵築楊橋漫口河務  
熟嫻即近年兗州府任內官聲甚優實與兗寧道  
相宜現在督臣與臣會題請

旨其拖克拖海已經擬補管河道於前所以臣未敢奏  
及也茲蒙降



旨垂詢臣謹繕摺

奏明伏祈

皇上睿鑒謹

奏

覽奏方始了然明晰前次奏摺中聲明一語則朕可省此問矣

雍正八年六月二十五日吏部尚書總督江南河

道臣嵇曾筠謹

奏為清口暢流朝宗有慶恭慰

聖懷事竊查江省清口為淮黃交匯南河第一要區必須勢均力敵二瀆合流方與運道民生大有裨益臣於六月初十日到任之始當詣清口看得東西束水二壩高峙整齊中間水勢深通自洪澤湖滔滔暢出併力敵黃二水滌洄交會東注於海詢據濱河父老咸稱數年來清口無此充暢臣因閱視高堰工程復由清口迤上查勘引河七道俱已刷

通逐一探量現在張福口水深七八九尺至一丈  
二三尺不等裴家場水深七八九尺至一丈三四  
尺不等張家莊水深六七八尺不等爛泥淺水深  
八九尺至一丈不等三岔河水深八九尺至一丈  
二三尺不等天然引河水深六七八尺不等天賜  
引河水深四五六七尺不等不須疏濬在在通利  
誠如

聖諭如果淮強黃弱便不引亦必暢流况蒙

恩指示發帑修築現今高堰山盱一帶土餞工程業已  
高寬堅厚即緊閉各壩蓄清專力敵黃亦可萬全  
無慮皆荷我

皇上睿慮精詳至誠感格迺克臻此嘉應也再查徐屬  
邳睢宿虹桃源外河山安等處俱係黃河要工目  
今伏秋交際修守機宜刻不容懈誠恐工長汛險  
廳佐營弁勤怠不齊臣已遴委効力人員在於緊  
要處所畫地分防協同廳汛相機保護臣隨前赴

各工挨次勘視添發銀兩償備料物嚴督弁兵遇  
有掃灣迎溜之處預為進埽加鑲不使險成費倍  
至於善後大工案內土埽工程雖經限滿尚未

題銷臣當一併細加查閱容臣循歷遍日另行具

奏外今將准黃經過伏汛順軌安流清口通暢工程  
穩固情由臣謹繕摺奏

聞恭慰

聖懷伏祈

皇上睿鑒謹

奏

屢戒卿等大言肆志不啻三令五申迺此慰朕之摺尚  
未齎至而馳驛報災之本已先呈覽不但朕懷無由而  
慰卿顏能不赧然為因今歲北地雨澤歉少恐至夏秋  
霖潦頻諭慎防汛水泛漲言猶未已今果如是矣善後  
事宜若不能會商詳計區畫萬全則何面目對靳輔齊  
蘇勒之祠堂乎悉心竭力勉為之

同日又

奏為請

旨事雍正八年六月十二日臣齋摺家人恭捧

皇上御批臣奏請隨帶人員奏摺到准欽奉

硃批諭旨臣跪讀之下不禁感激涕零伏念臣以菲材

遭逢

聖主異數殊恩有加靡已

生成訓示在在周詳清夜捫心報稱無地前因南河工

程臣未嘗熟悉受茲

簡任莫知所措犬馬愚忱誠恐有負任使故將衛輝府  
通判范昌治等四員

奏請隨帶以供臂指共期宣力保工永贖底定仰慰  
宸懷令蒙

天語春溫洞鑒深遠

聖諭詳明亟宜凜慎欽遵臣復逐一酌量僅將現任衛

輝府通判范昌治原任吳橋縣縣丞劉永錡二員



調至南工以資差遣其餘仍留豫省委用是否可  
行仰乞

皇上洪恩批示以便遵奉咨部臣謹恭摺請

旨伏祈

睿鑒施行謹

奏

所欲帶往之員料不過拖克拖海一流人物尚恐莫及  
何足深信凡為大吏者設弗存無我之公忠而懷為人

之私鄙則不免識近庸愚也要須看透此一著方是

雍正八年十一月初八日吏部尚書總督江南河

道臣嵇曾筠蘇州巡撫協理河工事務臣尹繼善

謹

奏為石工關係重大攬築酌分先後據實備陳仰祈  
睿鑒事竊照高堰石工蒙我

皇上軫念運道民生

特恩頒發百萬帑金創築高厚長堤以建萬年鞏固之

基

命前河臣孔毓珣等相度機宜大加修治誠為握要提  
綱一勞永逸盡善盡美至計當經前河臣孔毓珣  
會同臣尹繼善公同勘議繕摺奏陳竝委員領帑  
各處辦料在案臣曾筠到任以後屢詣該工逐一  
查勘竭力督催以冀早為告竣上副

宸衷懇注今幫築土餞已經修整一律完竣其石工各  
料現在立限嚴催乘此水落星飛趨運以濟修築

臣曾筠前往該工加謹先做樣工一段尤恐開挖甚深地泉滲灌迺開槽至一丈九尺底土乾燥人夫得以立足簽樁放心甃砌臨湖築工得此土頭誠為希有惟是承修各員內有現任廳營及向係在工効力者亦有奉

命新發來工并前河臣孔毓珣

題留承修者領工遲早不同則辦料亦先後不一而各料之中惟石料最多或辦自江南或辦自山東

今秋陰雨連綿在山之石既難開採湖河水大已採之石復難運送是以不能依限運足若不按工料料槩令一齊拆砌恐六十餘丈之長堤普律開挖成槽萬一砌未及半料不接濟轉瞬春汛全湖風浪關係非輕臣等再四思維惟有令承修各員按其現到料物陸續開工倣照樣工程式未完之前仍留外面舊堤以為保障既築之後漸次拆砌舊石以作全堤一面兼工分築一面嚴督趲運庶

已砌者各料應手計日可完未砌者原堤具在風浪無虞興工雖有後先收效仍無二致臣等為慎重要工起見理合先行繕摺據實陳明伏祈

皇上睿鑒謹

奏

此議甚善如是修砌庶免意外疎虞

雍正九年四月十一日吏部尚書總督江南河道

臣嵇曾筠謹

奏為敬陳查勘各工修築事宜仰祈

睿鑒事竊照黃運河堤增修善後伏荷

聖恩發帑興修仰見我

皇上宵旰勤求無時不以河定民安為念臣祇遵辦理

竭蹶奔馳兢惕彌深矢圖報效謹遍歷查勘黃河

上自徐州下至海口運河上自邳州下至江口兩

岸堤工縱橫綿亘幾及二千餘里誠恐該道廳勘

估未當臣親身履堤復加查核權其緩急先後審

其高矮分寸勘估一定趁此青黃不接之時即為發帑乘時修築并嚴飭承修印河各員令於附近地方招集貧民力作每日散給現錢以廣

皇仁而收實效到處歡呼踴躍現在上緊趲修其山東禹王臺壩工實為江南下游之保障緣上年咨商修築未免隔屬耽延仰賴

聖明

諭旨星馳臣即前詣該工看得沫水源長性猛今於現



在竹絡石壩二十七丈之外依其頂衝形勢統建  
石工六百餘丈蓋以竹絡盛石厚重堅凝隨沙坐  
實且於上秋水力猛峻若此而石壩屹然不動已  
有明驗其餘接連崗阜仍築土堤沫河口門大為  
挑浚以順其入海之路所有應需料物臣已發帑  
購辦上緊疏築務期壩高而堅堤實而厚河浚而  
深堵截沫水俾其循由故道直趨入海以除上秋  
浮溢致病之根以為運道民生永遠之計再江工

引河業已挑竣夾江鐵心壩亦已築成從前夾江  
之水逼注瓜洲今創築壩工攔截俾夾江之水全  
歸南岸依山東下而瓜洲水勢頓減一丈有餘將  
來伏汛屆臨開放引河之後大溜自必更加分減  
瓜城可保無虞矣謹將微臣查勘各工辦理事宜  
恭摺奏

聞伏祈

皇上睿鑒謹

奏

嘉悅覽焉保障江河一切要務惟卿是賴勉為之聖人垂訓智仁勇三字竝重缺一不可在卿分中勇字更當加勉凡應獨力承當之事槩弗推諉下吏自必咸皆感服奮興無論鉅細工程須集衆心羣力方始成功非一人所可能者運道民生關繫綦重省帑乃屬末節萬勿狃於節慎之見以致因小而誤大也誌之

雍正九年四月二十一日吏部尚書總督江南河

道臣嵇曾筠謹

奏為請

旨事竊臣准工部咨開准管理正紅旗漢軍都統和碩  
莊親王咨送本旗河工効力革職筆帖式毛浚首  
告河道康宏勳河工積弊應將毛浚并原呈發交  
河道總督會同江南總督將案内各款有名人員  
秉公審明律擬等因摺奏奉

旨依議欽此欽遵隨經移咨押發到臣遵即轉咨督臣

會飭布按二司提齊犯證確審詳擬以憑會勘但查毛浚呈控康宏勳侵帑營私事關重大理應嚴究以肅河工今河庫道康宏勳係屬現任經管錢糧出入現在聽審未便仍行辦事相應

奏請解任以便質審所遺河庫道一缺專司河帑攸關綦重必得謹飭廉隅出納明慎之員方克副錢糧重任并可表率通工查有新任揚州府知府張師載為人端方辦事謹飭係原任禮部尚書張伯

行之子合無仰懇

皇上天恩俯准該員就近補授河庫道自必益加勉勵  
報效至揚州府沿河要缺懇

恩另簡賢員轉移補授俱可無誤所有請將康宏勳解  
任質審并懇請將張師載補授河庫道緣由臣因  
整飭河工起見冒昧繕摺

奏陳伏祈

皇上訓示遵行謹

奏

張師載人雖端方或恐新任不諳河務與尹繼善再加斟酌具題奏請

雍正九年五月二十二日吏部尚書總督江南河

道臣嵇曾筠謹

奏為遵奉

聖訓宏深并陳工程水勢仰祈

睿鑒事竊臣於謹陳查勘各工修築事宜奏摺欽奉

皇上硃批諭旨跪讀之下悚惶誠服恭荷

指示智仁勇

訓誨精微蓋以天德治道智仁勇原為竝重而刻勵勇者正所以勉為智仁更闡千古不傳之奧義復荷訓旨詳明鼓舞羣策羣力而協同其心志恢宏經費利濟運道民生而不計及金錢大哉

皇言

聖德如天至誠動物典謨誓誥垂著萬年伏念微臣賦



質庸愚叨蒙

聖主裁成教育做惕其未逮策勵其將來凡有一得愚  
誠悉稟

聖明睿訓迺蒙

天語褒嘉頂踵倍難於報稱更凜

宸章誥誡黽勉益勵於旦明伏查近日工程情形增修  
善後一案前經臣遍歷相度勘估既定之後印河  
各官既分段承修應募貧民復歡呼踴躍是以成

功較速 臣復親行查勘多遣幹員逐一住工監催

潑水重礮攤坯密杵頗為堅實指日普律完竣以  
資捍禦山東禹王臺壩工計石絡六百餘丈工程  
業經報完現在加鑲邊絡一應土石疏濬各工伏  
汛前俱可全完再查五月內水勢情形仰賴

皇上精誠昭格懷柔僕應黃水旋長旋消現今堤工高  
出水面一丈二三尺不等埽工高出水面八九尺  
不等安流循軌益謹修防至南河各工惟宿虹廳

屬黃河形勢自徐邳兩岸山形夾東而下一折於南岸蔡家樓再折於北岸葉家莊而北岸附近宿遷山麓餘氣土性堅實不得不又折於南岸之古城孟誠庵等處百餘里之掃灣旋折勢大力勁且北岸逼近運河亦屬清黃交會之處甚為險要是以臣愚惴惴亟請築石壩以遏沫水於上濬六塘河以導駱湖於下增其屏藩啓其橐籥以為保全之計業蒙

俞旨興修自此不患其助黃添漲而惟在禦黃得法臣  
謹於六月移駐宿虹堤岸相機防護并可策應各  
廳至料物比照豫工立限辦完州縣盤查出結各  
工堆貯崇墉櫛比儘可應用臣惟有恪遵

聖訓多方籌度竭盡犬馬董理身先率同僚屬協力齊  
心以仰副

皇上軫念河防之至意不敢少有旁卸亦不敢狃於節  
慎致滋貽誤現今徐邳宿桃一帶雨水調勻刈麥

晴霽收穫豐稔米價頓減皆由我

皇上基宥密以格

穹蒼備裁成而回造化喜氣雲蒸歡聲雷動

天意人心太和翔洽自是安瀾有慶民悅無疆理合一併

奏

聞所有微臣遵奉

訓諭并陳河工情形敬謹繕摺具

奏伏祈

睿鑒謹

奏

覽奏深慰朕懷安不忘危一語固為治平之要術亦迺  
修防之祕訣當拳拳服膺不可須臾輕意肆志也

同日又

奏為恭報江工開放引河日期仰祈

睿鑒事竊照大江北岸瓜州花園港一帶緣江溜北趨  
城垣運道坍塌堪虞經臣奏請開挑正人洲引河

分溜南行以保北岸仰荷

聖明燭照

俞旨星馳臣祇遵辦理其挑挖引河創建夾江壩工疏築情形俱經節次

奏明今各工俱已完竣長江水勢正當盛長之時臣飭委淮揚道率同承挑各員乘勢開放并面授機宜去後茲據報呈遵於本月十八日齊集兵夫畚鍤雲集開放之頃第見水若排山大溜直趨引河

奔騰之勢直達河尾及開攔潮尾壩雖外面水高  
數尺而上源來水湍急抵禦出江衝刷更為有力  
兩岸民人聚觀洲上民船商舫順流揚帆俱由新  
關引河南下一時衆口歡呼咸各項戴

皇仁又據廳營汛弁稟報僉同臣隨飛檄道廳江工引  
河初放嚴飭防範善後其夾江貼心大壩并兩頭  
接築土堰崙為攔遏引河漫灘并潮汐湧掣不使  
斜注東北亟令僦築加高鑲做防風以資捍禦收



東其五公灘支河為引河下尾匯流之處再令熟  
諳弁兵多用鐵篦子混江龍器具往復乘船扒浚  
自此日引日深愈流愈順現今江勢南趨溜緩北  
注瓜洲花園港工程化險為平惟有相機防護加  
謹修守仰副我

皇上精誠協應奠定濱江之至意所有江工開放引河  
日期理合據實奏

聞伏祈

睿鑒謹

奏

引河開放情形欣悅覽焉善後事宜更當詳籌熟計以收久安長治之效毋稍疎忽

雍正九年八月十八日吏部尚書總督江南河道

臣嵇曾筠謹

奏為恭報八月水勢工程平穩情形仰慰

聖懷事竊照秋汛正中乃諸水湍急湧行之候而江南

黃運湖河尤為衆流會歸之區臣恪遵

聖訓時切加謹修防因宿遷黃運兩河當駱馬湖之首  
衝所以臣親駐宿遷上下策應調度前於七月內  
湖水長發已經搶護平穩今八月初十以後湖水  
又長堤埽工程業已搶築加高湖流循軌東注總  
因禹王臺竹絡壩工修築完固約攔湖之上源不  
使沫水合流又六塘河疏濬通暢宣洩湖之下游  
俾得去路順利是以湖水雖大而無疎虞伏查沫

水於七月初九等日長至七尺五寸至二十九日  
又陡長一丈而禹王臺千丈壩工抵住水勢即由  
汴河就近入海不得下趨所有邳宿黃運湖河一  
帶運道民生咸資利涉而登衽席再查黃河水勢  
自徐邳以至雲梯入海大溜順注水行沙刷毫無  
阻滯凡掃灣迎溜之所埽壩高堅屹如磐石料物  
堆貯甚多雖秋汛綿長兩岸工程可力保平穩洪  
澤湖水勢加長舊例開放天然等壩宣洩臣念高

寶濱河沃壤秔稻倍加茂盛欣值時和歲稔築場  
納稼指顧秋成未便再行浸灌况敵黃濟運尤屬  
緊要是以臣將天然等壩堅守不放涓滴不洩俾  
清口益為順暢下河苗稼各得遂其長養秀實今  
入秋以來湖水長至六尺有餘風恬浪靜湖工寧  
謐上秋被水之處如高郵寶應江都鹽城興化等  
州縣今已數倍豐收農夫野老含哺鼓腹歡呼載  
道依然巷舞塗歌至於江工開挖引河堵築夾壩

業已分其溜勢桃伏兩汛平穩之至至七月初旬  
疊遇風潮今秋川水又大瓜洲民居稠密市舍繁  
多臨江地土連年坍塌逼近城池殊為危險臣多  
方籌畫晝夜經營沉石船以護崖垠築石絡以保  
崖岸用柳草捆紮龍尾埽以禦潮汐臣復思江面  
寬廣水力峻猛因將各工購貯木植指授做法紮  
筏成牌作壩挑水安放移時當即挑開大溜數十  
丈水勢安瀾居民士庶咸為踴躍歡忭向非挑河

築壩早分其勢遇此秋漲當必倍費周章總仰賴  
我

皇上聖明天縱重念江防緊要不減河防一

聞陳奏即奉

硃批速議俾臣得以早為修護用資防禦今秋汛已見  
平安而來年桃伏秋之水勢工程仍當於今冬預  
為辦理有備無患臣惟矢竭心力審度萬全務期  
黃淮底定永慶安瀾以仰酬

高厚隆恩於萬一恐塵

聖懷敬將八月水勢各工平穩情形恭摺奏

聞伏祈

睿鑒謹

奏

以手加額覽焉有旨諭部矣

雍正九年十二月十九日吏部尚書總督江南河

道臣嵇曾筠謹



奏為奏明備辦修築情形并陳慎工節帑事宜仰祈  
睿鑒事竊照江南黃運湖河蒙我

皇上睿謨宏遠

訓示周詳現今各案工程俱得整理遞加修守運道民  
生均荷

天恩萬年利濟伏查高堰大工臣上緊催督勸懲互用  
歲底已有七分工程且三冬天氣融和夫衆得以  
展力凡在工官民匠役莫不歡欣踴躍感頌

皇仁自此大工漸次告成得以仰副

聖懷至瓜洲濱江要工經臣奏明於對江挑挖引河攔

築夾壩分溜南注而北岸花園港等處酌用椿埽  
相機建築挑水壩以禦外溜但城垣之下地脈虛  
鬆必得填實基址以為內固因倣照前人保守江  
海塘岸之法用高大木櫃裝載石塊深埋地底俾  
江溜不致搜刷以護崖岸其所需工料臣亦不敢  
另請帑銀惟於來年歲搶錢糧內通融計處再查

本年新善後大工一案業經告竣現在逐細丈量以核土方而預備明年物料已經沿堤堆貯復委印官逐細盤查以杜浮冒又於擬定成規案內臣悉心詳議凡柴束椿木石料土方等項或照時查驗乾濕或按程途遠近或照取土乾溽逐一遞減相平比照舊例土方每用至十萬兩者可約省帑八千餘兩至一萬餘兩椿木每用至十萬兩者可約省帑四五千兩石料每用至十萬兩者可約省

帑五六千兩俱係確核酌定使各廳無有偏枯而帑項亦可節省業經恭疏會

題在案倘蒙覆准積年計算或於工帑不無小補所有攢辦要工情形節慎工帑事宜臣謹據實恭摺奏陳伏祈

皇上睿鑒謹

奏

工程既能趨辦帑項又不虛糜可嘉之外更復何諭

同日又

奏為欽奉

上諭事竊臣接准戶部遞到大學士張廷玉等寄字內  
開雍正九年十一月十五日奉

上諭爾等所奏登鎮河標漕標添兵之處行文各處時  
再寫信與總漕兩處總河登州總兵官文到日著即  
行召募挑選務擇技勇漢仗可觀之人充補毋得延  
玩怠忽虛應故事一應添設員弁營房事宜亦作速

會同督撫定議具奏其兵丁召募完日先行知會爾等欽此欽遵又准戶部咨內開遵

旨酌議請將漕標及兩河標兵各添設一千名與添設登鎮陸路之兵共四千名精選技勇壯健之人一應馬匹盔甲軍器務製備齊全一有調撥即可起程其應加守千等員及應建營房會同該督撫詳酌妥議具題等因奉

旨依議欽此移咨到臣當即欽遵飛檄司道標營星將

添設事宜一面籌議一面召募務期挑選年力強壯熟嫻技勇之人方准入伍其營馬一項最關緊

要理應星速購買若必俟議定始於司庫領價赴買誠恐往返稽延臣一面遴員暫借河庫帑銀令

其速往直隸等處採買但路途遙遠隆冬草枯即

尅期辦到餵養尚需時日一面諄諭通工文武官弁即在附近地方領價協辦一百餘匹事屬衆擎易舉一俟兵丁招齊即為分發如有調撥先有協

辦之肥馬并添選兩營之舊馬儘可足用其一切  
軍裝甲械行營礮位在所必需臣逐細開單條分  
縷析飛檄司道標營隨議隨辦解送呈驗不致臨  
事周章至加添守千等員及營房糧餉事宜現在  
督撫各臣俱集清江會審臣面為商酌妥協會

題伏念微臣由詞臣通籍疊蒙

皇上隆恩豫東江省畀以封圻重任際此修明武備寧  
輯地方之盛舉惟有殫心努力敬謹辦理尅期完



備即行奏

聞臣當親督弁員勤加操練以冀少助干城之用仰慰  
宸衷於萬一耳所有遵奉趨辦添兵事宜臣謹據實恭  
摺

奏陳伏祈

皇上睿鑒謹

奏

折衝於樽俎之間正謂詞臣能禦侮也但貴實心任事

何有文武之分辦理得宜嘉是覽之

雍正十年正月二十一日吏部尚書總督江南河

道臣嵇曾筠謹

奏為欽奉

上諭事雍正十年正月十一日臣齋摺家人敬捧河標  
增添兵馬事宜奏摺欽奉

硃批諭旨臣跪讀之下感激涕零伏念臣以庸愚仰沐  
聖恩高厚既畀封疆重任即為軍旅攸司况蒙

訓勉洪慈敬荷

聖明指示自當益勵愚悃勉竭駘駘敢謂文武之分途  
猥以書生而謝責今新募兵丁已足一千名之數

臣親加細驗俱稱勇壯內以六百名留駐清江以  
四百名分發徐宿兩營收伍即於兩營舊兵頭目  
內考拔技勇優長弓馬嫻熟者數人授以外委千  
把令其教習新兵勤加訓練又調委守備二員約  
束稽查并諭署徐州營副將葛世雄右營遊擊黃

正元等凡入伍兵丁俱即開支糧餉分別馬步戰  
守考其勤惰優劣上緊操演不獨使新兵由此慣  
習且使舊兵益加精練臣仍不時親督校閱申嚴  
賞罰鼓勵振作務使技藝精熟行伍整齊冀成節  
制之師以備干城之用設有調遣即堪驅使庶幾  
上副

聖謨下抒臣悃不敢草率因循稍為怠忽也所有召募  
兵丁足數現在勤加訓練緣由相應遵

旨先行知會大學士等外臣謹繕摺

奏明伏祈

皇上睿鑒謹

奏

不時校閱加意勤操弓馬固須熟嫻步伐尤宜精練令  
士卒演習趨捷若能日趨百里則涉險履平何往不利  
此雖難期驟效可以由漸而成

雍正十年三月初八日吏部尚書總督江南河道

奏為甘雨麥苗霑足運河水勢深通據實奏

聞恭慰

聖懷事竊臣因桃汛將屆前往徐邳一帶查勘工程見兩岸麥苗青蔥茂盛自二月初二日得雨之後或三五日或七八日即得雨一次徐邳淮揚等處麥田俱各霑足父老歡呼踴躍祈望豐收其運河水勢上下皆各深通糧艘通行無阻至上年所做新

善後工程久經告竣臣俱委員逐段詳勘凡有虛  
鬆不足之工立即押令補修如式復又親自抽段  
丈量務令俱照原估一律堅厚現在料物櫛比盈  
堤盤查確實本年歲搶埽壩工程亦皆逐細指示  
各廳乘時加緊儻做以禦汎水所有兩岸堡房現  
俱建蓋堡夫亦即日召募齊全臣惟有恪遵

聖訓殫心竭力不敢一刻稍有懈弛不敢一事稍有疎  
忽務期黃運湖河各處工程均如磐石之安永奏

安瀾之慶上慰

聖懷惟祈我

皇上於日理萬幾之中節勞頤養保合太和此微臣拳  
拳孺慕之忱日望

九重而翹祝者也謹將臣查勘工程目覩雨水霑足運  
道深通情形據實恭摺奏

聞伏祈

睿鑒謹



奏

覽雨水霑足運道深通情形曷勝額慶朕躬近已大愈較之未病之前更覺爽健絲毫無庸過慮也

雍正十年六月初八日吏部尚書總督江南河道

臣嵇曾筠謹

奏為伏汛水勢工程平穩情形仰祈

睿鑒事竊照伏汛以前臣恪遵

訓諭查勘各工備料修防一應埽壩務令出水高厚以

資捍禦業經具摺

奏明嗣於閏五月間淮徐淮揚地方甘霖疊沛又兼  
淮水長發上源豫省七十二道溪河之水俱匯注  
於洪澤湖陸續加長八尺有餘更比黃水少強幸  
賴

皇上睿照幾先發帑修築高堰石工一律加高足以抵  
禦湖水由清口暢流入海臣見水勢盛長隨親赴  
下游山安海防一帶督率加鑲埽壩工程飛飭廳

汛員弁兵夫晝夜上緊修守况南岸徐家莊北岸

四套皆係新築土工尤當竭力保護但見水勢滔

滔東注兩岸俱各平寧伏查淮水積長二十餘日

尚未消減而寧夏又兩次報黃水長發臣恐淮黃

竝漲工程民社攸關隨查照往例將山旴廳屬之

天然南壩酌量開放宣洩洪湖之水親赴高郵寶

應一帶查勘運河先將芒稻閘開放宣洩入江次

將高郵減水壩酌開一二處俾其從容漸進由各

港口串場河入海免致臨期湧激有宣洩不及之虞總之今年汎水雖大而料物豐盈又加謹搶護上下閘壩宣洩得宜自無意外之患現在各工鞏固伏汎平安臣思秋汎接踵繼至不敢稍懈一面飭令淮徐道駐劄上游淮揚道駐劄下游臣上下往來策應查察務保兩汎平安以仰副

聖心於萬一耳所有伏汎水勢長發各工平穩情形理

合恭摺奏

聞仰慰

睿懷謹

奏

淮黃竝漲亟應酌量宣洩但以理揆之伏汎既大秋汎水勢自將平減然亦何敢預必仍須加意慎防

雍正十年八月二十一日吏部尚書總督江南河

道臣嵇曾筠謹

奏為恭報秋汎已竣水勢工程平穩情形敬慰

聖懷事竊惟江南黃運湖河水勢前於伏秋汛內經臣

節次

奏明荷蒙

皇上睿慮周詳

訓諭小心防護臣凜慎欽遵加謹修守因七月望後天  
雨連綿水勢浸長隨復飛飭道廳汛弁用心防守  
臣往來查察相機搶護雖沿海風潮甚大抵住黃  
流而兩岸埽壩加鑲高厚料物豐餘人力齊集足

資捍禦目下秋汛已竣工程鞏固臣不敢因汛水  
過期稍為懈怠惟有凜遵

聖訓倍加勤惕矢誠矢敬慮後思前務保河防永固運  
道深通以冀仰報

皇上天恩於萬一耳除秋汛水勢另行會疏

題報外臣謹將各工平穩情形先為繕摺具  
奏敬慰

聖懷伏祈

睿鑒謹

奏

覽奏秋汛安穩情形惟以手加額為沿海濱河億兆慶  
幸焉耳

硃批諭旨卷一百七十五之三





總校官庶吉士臣侍朝

校對官編修臣莫瞻菴

謄錄監生臣王淦